

旧唐书

第二函
十六册

舊唐書卷一百九十六下

列傳第一百四十六下

吐蕃下

永泰二年二月命大理少卿兼御史中丞楊濟修好于吐蕃四月吐蕃遣首領論泣藏等百餘人隨濟來朝且謝申好大厯二年十月靈州破吐蕃二萬餘眾生禽五百人獲馬一千五百匹十一月和蕃使檢校戶部尚書兼御史大夫薛景仙自吐蕃使還首領論泣陵隨景仙來朝景仙奏云贊普請以鳳林關爲界俄又遣使路悉等十五人來朝三年八月吐蕃十萬寇靈武大將尙悉摩寇邠州邠寧節度使馬璘破二萬餘眾禽其俘以獻之九月寇靈州朔方騎將白元光破之俄又復破二萬眾於靈武獲羊馬數千計關內副元帥郭子儀於靈州破吐蕃六萬餘眾十二月以蕃寇歲犯

西疆增修鎮守乃移馬璘鎮涇州仍爲涇原節度使劍南西川亦破吐蕃萬餘眾五年五月徙置安悉拓靜恭五州于山陵要害之地以備吐蕃八年秋吐蕃六萬騎寇靈武蹂踐我禾稼而去十月寇涇邠等州郭子儀遣先鋒將渾瑊與賊戰于宜祿我師不利副將史籍等三人歿之村墅居人爲驅掠者凡千餘人是夜瑊收合散卒襲賊營會馬璘亦襲其輜重凡殺數千人賊遂潰子儀大破吐蕃十餘萬眾初吐蕃犯我邠郊馬璘以精卒二千餘人潛夜掩賊營射賊豹皮將中目賊眾扶之號泣遂舉營遁去璘因收獲朔方兵健二百餘人百姓七百餘人駝馬數百匹九年四月以吐蕃侵擾預爲邊備乃降敕宣令子儀以上郡北地四塞五原義渠稽胡鮮卑襍種步馬五萬眾嚴會柁邑克壯舊軍抱玉以晉之高都韓之上黨河湟義從汧隴少年凡三萬眾橫絕高壁斜界連營馬

璘以西域前庭車師後部兼廣武之戍下蔡之徭凡三萬眾屯於
河中張大軍之援忠誠以武落別校右地奇鋒凡二萬眾出岐陽
而北會希讓以三輔太常之徒六郡良家之子自渭上而西合汴
宋潁清河陽幽薊總四萬眾分列前後魏成德昭義永平總六萬
眾大舒左右朕內整禁旅親誓諸將資以千金之費錫以六牧之
馬其戎裝戰器軍用邊儲各有司存素皆精辦咨爾將相文武宣
力之臣夫師克在和善戰不陳各宜保據疆界屯據要衝斥堠惟
明首尾相應若旣悔過何必勞人如或不恭自當伐辜然後眷求
統一以制諸軍進取之宜俟於後命十一年正月劔南節度使崔
寧大破吐蕃故洪等四節度兼突厥吐渾氏蠻羌党項等二十餘
萬眾斬首萬餘級生禽螭城兵馬使一千三百五十人獻于闐下
牛羊及軍資器械不可勝紀十二年九月入寇坊州掠党項羊馬

而去十月崔寧破吐蕃望漢城十四年八月命太常少卿韋倫持
節使吐蕃統蕃俘五百人歸之十月吐蕃率南蠻眾二十萬來寇
一入茂州過汶川及灌口一入扶文過方維白壩一自黎雅過邛
崃關連陷郡邑乃發禁兵四千人及幽州兵五千人同討大破之
建中元年四月韋倫至自大厯中聘使前後數輩皆畱之不遣俘
獲其人必遣中官部統徙江嶺因緣求財及給養之費不勝其弊
去年冬吐蕃大興師以三道來侵會德宗初卽位以德綏四方徵
其俘囚五百餘人各給衣一襲使倫統還其國與之約和敕邊將
無得侵伐吐蕃始聞歸其人不之信及蕃俘入境部落皆畏威懷
惠其贊普乞立贊謂倫曰不知是來也而有三恨柰何倫曰未達
所謂乞立贊曰不知大國之喪而弔不及哀一也不知山陵之期
而賻不成禮二也不知皇帝舅聖明繼立已發眾軍三道連衡今

靈武之師聞命輒已而山南之師已入扶文蜀師已趨灌口追且不及是三恨也乃發使奉贄不二旬而復命蜀帥上所獲戎俘有司請準舊事頒爲徒隸上曰要約著矣言庸二乎乃各給縑二匹衣一襲而歸之五月以韋倫爲太常卿復使吐蕃其冬遣宰相論欽明思等五十五人隨倫至且獻方物吐蕃見倫再至甚歡旣就館聲樂以娛之畱九日而還兼遣其渠帥報命二年十二月入蕃使判官常魯與吐蕃使論悉諾羅等至自蕃中初魯與其使崔漢衡至列館贊普令止之先命取國信敕旣而使謂漢衡曰來敕云所貢獻物竝領訖今賜外甥少信物至領取我大蕃與唐舅甥國耳何得以臣禮見處又所欲定界雲州之西請以賀蘭山爲界其盟約請依景龍二年敕書云唐使到彼外甥先與盟誓蕃使到此阿舅亦親與盟乃邀漢衡遣使奏定魯使還奏焉爲改敕書以貢

獻爲進以賜爲寄以領取爲領之且謂曰前相楊炎不循故事致此誤爾其定界盟竝從之三年四月放先沒蕃將士僧尼等八百人歸還報歸蕃俘也九月和蕃使殿中少監兼御史中丞崔漢衡與蕃使區頰贊至時吐蕃大相尙結息忍而好殺以嘗覆敗於劍南思刷其恥不冝約和其次相尙結贊有材略因言於贊普請定界明約以息邊人贊普然之竟以結贊代結息爲大相終約和好期以十月十五日會盟於境上以崔漢衡爲鴻臚卿以都官員外郎樊澤兼御史中丞充入蕃計會使初漢衡與吐蕃約定月日盟誓漢衡到商量未決已過其期遂命澤詣結贊復定盟會期且告遣隴右節度使張鎰與之同盟澤至故原州與結贊相見以來年正月十五日會盟於清水西四年正月詔張鎰與尙結贊盟于清水將盟鎰與結贊約各以二千人赴壇所執兵者半之列於壇外

二百步散從者半之分立壇下鎡與賓佐齊映齊抗及會盟官崔
漢衡樊澤常魯于頓等七人皆朝服結贊與其本國將相論悉煩
藏論臧熱論利駝斯官者論力徐等亦七人俱升壇爲盟初約漢
以牛蕃以馬鎡恥與之盟將殺其禮乃謂結贊曰漢非牛不田蕃
非馬不行今請以羊豕犬三物代之結贊許諾塞外無豕結贊請
出羝羊鎡出犬及羊乃於壇北刑之襍皿二器而歆盟文曰唐有
天下恢奄禹迹舟車所至莫不率俾以累聖重光歷年惟永彰王
者之不業被四海之聲教與吐蕃贊普代爲婚姻固結鄰好安危
同體甥舅之國將二百年其閒或因小忿棄惠爲讐封疆騷然靡
有寧歲皇帝踐阼愍茲黎元俾釋俘隸以歸蕃落蕃國展禮同茲
協和行人往復累布成命是必詐謀不起兵車不用矣彼猶以兩
國之要求之永久古有結盟今請用之國家務息邊人外其故地

棄利蹈義堅盟從約今國家所守界涇州西至彈箏峽西口隴州西至清水縣鳳州西至同谷縣暨劔南西山大渡河東爲漢界蕃國守鎮在蘭渭原會西至臨洮東至成州抵劔南西界磨些諸蠻大渡水西南爲蕃界其兵馬鎮守之處州縣見有居人彼此兩邊見屬漢諸蠻以今所分見住處依前爲定其黃河以北從故新泉軍直北至大磧直南至賀蘭山駱駝嶺爲界中間悉爲閒田盟文有所不載者蕃有兵馬處漢有兵馬處漢守竝依見守不得侵越其先未有兵馬處不得新置并築城堡耕種今二國將相受辭而會齊戒將事告天地山川之神惟神照臨無得愆墜其盟文藏于宗廟副在有司二國之成其永保之結贊亦出盟文不加於坎但埋牲而已盟畢結贊請鑑就壇之西南隅佛幄中焚香爲誓誓畢復升壇飲酒獻酬之禮各用其物以將厚意而歸二月命崔

漢衡持節荅蕃遣區頰贊等歸上初令宰相尙書與蕃相區頰贊盟於豐邑里壇所盟以清水之會不定遂罷因畱頰贊未遣復令漢衡使於贊普六月荅蕃使判官于頔與蕃使論頰沒藏等至自青海七月以禮部尙書李揆加御史大夫爲入蕃會盟使又命宰相李忠臣盧杞關播右僕射崔寧工部尙書喬琳御史大夫于頔太府卿張獻恭司農卿段秀實少府監李昌夔京兆尹王翊左金吾衛將軍渾瑊等與區頰贊等會盟於壇所初于頔至自蕃中與尙結贊約疆場既定請歸其使從之以豐邑坊盟壇在京城之內非便請卜壇於京城之西其禮如清水之儀先盟二日命有司告太廟盟官致齊三日朝服升壇關播跪讀盟文盟畢宴賜而遣之興元元年二月以右散騎常侍兼御史大夫于頔往涇州已來宣慰吐蕃仍與州府計會頓遞時吐蕃款塞請以兵助平國難故遣

使焉四月命太常少卿兼御史中丞沈房爲入蕃計會及安西北
庭宣慰使是月渾瑊與吐蕃論莽羅率眾大破朱泚將韓旻張廷
芝宋歸朝等於武功之武亭川斬首萬餘級貞元二年命倉部郎
中兼侍御史趙聿爲入吐蕃使八月吐蕃寇涇隴邠寧數道掠人
畜取禾稼西境騷然諸道節度及軍鎮咸閉壁自守而已京師戒
嚴上遣左金吾將軍張獻甫與神策將李昇曇蘇清洸等統兵屯
於咸陽召河中節度駱元光率眾戍咸陽以援之九月以吐蕃游
騎及於好時上復遣張獻甫等統兵屯於咸陽又詔遣左監門將
軍康成使于吐蕃初吐蕃大相尙結贊累遣使請盟會定界乃命
成使之至上砦原與結贊相見令其使論乞陀與成同來是月鳳
翔節度使李晟以吐蕃侵軼遣其將王泌夜襲賊營率驍勇三千
人入汧陽誠之曰賊之大眾當過城下無擊其首尾首尾雖敗中

軍力全若合勢攻之汝必受其弊但俟其前軍已過見五方旗虎豹衣則其中軍也出其不意乃是奇功必如其言出擊之賊眾果敗副將史廷玉力戰歿之又寇鳳翔城下李晟出兵禦之一夕而退十月李晟遣兵襲吐蕃之堆沙堡大破之焚其歸積斬蕃酋扈屈律設贊等七人傳首京師十一月吐蕃陷鹽州初賊之來也刺史杜彥光使以牛酒犒之吐蕃謂曰我欲州城居之聽爾率其人而去彥光乃悉眾奔鄜州十二月陷夏州刺史拓拔乾暉率眾而去復據其城又寇銀州素無城壁人皆奔散三年春命檢校左庶子兼御史中丞崔潯爲入吐蕃使相次又遣左庶子李錡使之河東保寧等道節度使馬燧來朝初尙結贊旣陷鹽夏等州各畱千餘人守之結贊大衆屯於鳴沙自去冬及春羊馬多歿糧餉不給時詔遣華州潼關節度駱元光邠寧節度韓游瓌統眾與鳳翔鄜

邠及諸道戍卒屯於塞上又命燧率師次於石州分兵隔河與元光等犄角討之結贊聞而大懼累遣使請和仍約盟會上皆不許又遣其大將論頰熱厚禮卑詞求燧請盟燧以奏焉上又不許惟促其合勢討逐燧喜賂信詐乃與頰熱俱入朝盛言其可保信許盟約上於是從之燧既赴朝諸軍但閉壁而已結贊遽悉其眾棄夏州而歸馬既多歿有徒行者及是夏平涼之會竟渝盟馬燧亦由此失兵柄而奉朝請矣四月崔澣至白鳴沙初澣至鳴沙與尙結贊相見詢問其違約陷鹽夏州之故對曰本以定界碑被牽倒恐二國背盟相侵故造境上請修舊好又蕃軍頃年破朱泚之眾於武功未獲酬償所以來耳及徙涇州其節度使閉城自守音問莫達又徙鳳翔請通使於李令公亦不見納及遣康成王眞之來皆不能達大國之命日望大臣充使兼展情禮實無至者乃引軍

還及鹽夏二州之師二州懼我之眾請以城與我求全而歸非我
所攻陷也今君以國親將命若結好復盟蕃之願也盟會之期及
定界之所唯命是聽君歸奏決定當以鹽夏相還也又云清水之
會同盟者少是以和好輕慢不成今蕃相及元帥已下凡二十一
人赴盟靈州節度使杜希全稟性和善外境所知請令主盟會湟
州節度李觀亦請同主之又同章表上聞泚誘賂蕃中給役者求
其人馬真數凡五萬九千餘人馬八萬六千餘匹可戰者僅三萬
人餘悉童幼備數而已是日改崔泚爲鴻臚卿再入吐蕃令泚報
尙結贊曰杜希全職在靈州不可出境李觀今已改官以侍中渾
瑊充盟會使約以五月二十四日復盟於清水又令告以鹽夏二
州歸于我纔就盟會上疑蕃情不實以得州爲信焉五月渾瑊以
充盟會使來辭且受命以兵部尙書崔漢衡爲盟會副使司勳員

外郎鄭叔矩爲判官渾瑊赴會盟所上令瑊統眾二萬餘人遣華州潼關節度駱元光赴之上令宰臣召吐蕃使論泣贊等於中書議會盟之所初崔澣與尙結贊約復會於清水且先歸我鹽夏二州結贊云清水非吉地請會於原州之士梨樹又請盟畢歸二州澣遣使與泣贊等同奏上務懷柔遠人皆從之約以五月十五日盟于土梨樹上召宰臣謀之先是左神策將馬有麟奏土梨樹地多險隘恐蕃軍隱伏不利于我平涼川四隅坦平且近涇州就之爲便由是乃定盟所於平涼川時蕃使論泣贊已復命遽追還告而遣之渾瑊與尙結贊會於平涼初瑊與結贊約以兵三千人列于壇之東西散手四百人至壇下及將盟又約各益游軍相覘伺結贊擁精騎數萬于壇西蕃之游軍貫穿我師瑊之將梁奉貞率六十騎爲游軍纔至蕃中皆被執畱瑊不虞也結贊又遣人請瑊

曰請侍中以下服衣冠劔佩以俟命蓋誘其下馬將劫持之賊與崔漢衡監軍特進宋鳳朝等皆入幕次坦無它慮結贊命伐鼓三聲其眾呼譟而至城遽出自幕後遇得它馬跨而奔歸時馬不加銜賊伏于鬣而手加之凡馳十餘里銜方及口故追騎之矢過而不傷焉唯城之裨將辛榮招合數百人據北阜與賊接戰須臾賊眾四合榮力屈而降鳳朝及城判官韓弁竝爲亂兵所殺漢衡及中官劉延邕俱文珍李清朝漢衡判官鄭叔矩路泌掌書記袁同直大將扶餘準馬寧及神策鳳翔河東大將孟日華李至言樂演明范澄馬弁等六十餘人皆陷焉餘將士及夫役歿者四五百人驅掠者千餘人咸被解奪其衣初漢衡爲亂軍所擊其從吏呂溫以身蔽之刃中溫而漢衡獲免漢衡乃夷言謂執者曰我漢使崔尙書也結贊與我善汝若殺我結贊亦殺汝乃舍之盡驅而西旣

已面縛各以一木自領至趾約于身以毛繩三束之又以毛繩連其髮而牽之夜皆踣於地以髮繩各繫一櫬又以毛罽都覆之守衛者臥其上以防其亡逸也至故原州結贊坐于帳中召與相見數讓國家因怒渾瑊曰武功之捷皆我之力許以涇州靈州相報皆食其言負我深矣舉國所忿本劫是盟在禽瑊也吾遣以金飾桎梏待瑊將獻贊普旣以矢之虛致君等耳當遣君輩二人歸也呂溫帶創亦至結贊嘉其義厚給賚之結贊率其眾於石門遣中官俱文珍渾瑊之將馬寧馬燧之將馬弁歸于我遂送漢衡叔矩等囚於河州辛榮扶餘準等於故廓州鄯州分囚之結贊本請杜希全李觀同盟將執二節將率其銳師來犯京師希全等旣不行又欲執渾瑊長驅入寇其謀也如此上遣中官王子恆齎詔書以遺結贊蕃界不納而還初瑊與駱元光將發涇州元光謂瑊曰